



## 發牙、擲牙、種牙

俗語講「牙疾毋係病，疾起來真愛命！」特別係若堵著禮拜抑係歇暍日診所無開，遐時務即疾到嘴擘毋會開，喊天天毋會應，哀地地無聲。時間毋知愛仰子過。坐嘛毋係，企嘛毋係，鬥底愛仰子呢？現時個人壽命加真長，老罔老，生活嘛愛有品質。日本有一個「八二」個觀念，即係老儕活到八十歲，頭好猶愛有二十齒個真牙。若無牙好嚙，消化即會糲，吸收跔啊壞，即會欠營養，身體抵抗力即會降，到時歸身病，到老即真苦憐。所以愛好好寶惜自家個牙。牙係個人頭要緊個老本。

細子出世係無牙獅，等到開始發牙個時，序大人即真歡喜。代表細子好供，一夜大一寸。差不多係「七坐、八爬、九生牙」，會用食副食品個時，這時務即愛買一兜餅得佢罔咬罔咬，講係細子發牙牙槽癢，愛食物件。慢慢頭前牙、大牙、後背牙攏總二十八枝乳牙做一下發齊。自發牙個時即愛好好照顧。若無，有個細子即會有「奶瓶性蛀牙」，歸嘴攏係綿牙。莫當做遐係無要緊，遐係會影響著細子個信心、影響著換牙、後擺個牙會發無正，發暴暴個豬哥牙。牙槽形毋會靚，面形嘛會影響著，你經這有幾要緊。

等到讀國小個時，開始換牙。成過攏係自家罔搖罔搖，有時務自家即枷牙搖落來。序大人講，若係下腳層個牙即愛企在屋簷下，雙腳企正正，枷牙挑起去屋嶺，後擺發個牙正會正。面上層個牙即愛腳骨企正正，擊入去眠床下，按牙正會靚。有時務枷阿怙講牙在搖，阿怙即講「佢摸睭望下」。好天泥，阿怙即會用佢遐兩枝手指頭大力枷牙擲起來。若一下無擲起來，佢嘛文文惑：「無要緊，來，阿怙攏睭下。」猶係共款攏大力枷牙掣起來。無像今個醫術進步，毋單講愛去得人擲牙，連「牙齒矯正」個生意嘛全然好，代表講，今個人較重視門面。

毋過，年歲愈來愈大，機器用久嘛會磨損。黏泥愛補牙、黏泥愛鑲牙，若係牙根猶好好，即做一枝假牙套起來。若連牙根都崩壞去，這下即愛開大錢啊。會用開幾下千銀即好，毋過壞牙兩裡個牙愛掣一兜仔莫，共齊做三枝假牙套起去。若無即愛真麻煩個種牙。擲牙後隨屯骨粉慢慢枷牙槽養得佢勇，鎖欵做個牙根，等和牙槽骨結縕正攏做假牙鬥起去。身體愛勇以外，猶愛做幾下回個手術和診斷，時間真長。為著自家個康健，大家愛養成好個慣勢，得自家有一嘴個好牙，會用康康健健到老。

作者：李秉璋

### ☆詞彙學習☆

【無牙獅】mo` nga` sai`：指尚未長出牙齒的小孩或是笑牙齒掉光的人。

【發牙】fad` nga`：長牙齒。

【牙槽】nga` coo`：齒槽。牙床周圍的組織。包圍牙根，讓牙根嵌入的凸凹腔。

【頭前牙】teu` cien` nga`：門牙。

【豬哥牙】zhi` goo` nga`：暴牙。牙齒長歪外露，如同大公豬的兩顆大暴牙般。

【文文惑】bbun` bbun` foo`：溫和的哄騙。

【種牙】zhung` nga`：植牙。一種牙齒的治療法。用天然或人工製的牙齒移植到完全拔除舊牙的齒槽骨上。

【屯骨粉】tun` gud` fun`：做植牙手術時，將舊齒拔除後於齒槽內填上骨粉，使之當做來日植牙時的基底以固定牙根。

【牙槽骨】nga` coo` gud`：顎骨。圍繞牙根及覆蓋上下頤齒槽的骨頭。